

*Alþingi*  
*Erindi nr. P 135/2952*  
*komudagur. 23.5.2008*

Til Elínar Valdísar Þorsteinsdóttur nefndarritara,  
Nefndasviði Alþingis,  
Austurstræti 8-10,  
150 Reykjavík.

23. maí 2008

**Krabbameinsfélag Íslands hefur fengið til umsagnar frv. t. l. um sjúkratryggingar, 613. mál, heildarlög.**

Fyrir hönd Krabbameinsfélagsins vil ég þakka fyrir að fá ofangreint frumvarp til umsagnar. Því miður tók það vikutíma í pósti til mín þannig að einungis hefur gefist einn og hálfur dagur til að kynna sér efni þess með öðrum störfum og skuldbindingum.

Hér er greinilega um grundvallarbreytingar á skipulagi stjórnsýslu heilbrigðisþjónustunnar að ræða og virðist frumvarpið vel unnið og þar tekið mið af nútímalegum starfsháttum eins og gæðaeftirliti, árangursstjórnun og kostnaðargreiningu. Hins vegar er óraunhæft að gera efnislegar athugasemdir eftir svo stuttan tíma til að kynna sér málið, einkum þar sem það kallar á breytingar á fjölmörgum gildandi lögum sem ekki gefst kostur að kanna nánar og bera saman.

Það er gagnrýnivert að ekki skuli gefinn meiri tími, bæði fyrir alþingismenn og einnig þá mörgu aðila í samfélaginu sem koma að heilbrigðisþjónustu til að kynna sér þessar breytingar og ræða þær. Vafalaust eru margar þeirra til bóta en spurningar vakna strax varðandi ýmsa þætti, t.d. hvort nægilegu fjármagni verði varið til þessarar nýju stofnunar og svo þeirra sem fyrir eru og annast skylda þjónustu. Líka hvort hugað hafi verið nægilega vel að því að öll réttindi haldi sér við breytingar á fjölmörgum lögum sem tengjast heilbrigðisþjónustu. Einnig, hvernig þessi nýja stofnun muni skipa sér í raðir þeirra sem þegar sinna heilbrigðismálum, hvort hún muni fjarlægja eða hindra samskipti heilbrigðisráðuneytis við þá sem veita heilbrigðisþjónustu. Ennfremur hlutverk stofnunarinnar og tengsl við pólitíska stefnumótun í heilbrigðismálum.

Hér er um viðamiklar breytingar að ræða á viðkvæmum málaflokki þar sem miklu varðar að vel sé að öllu staðið og að sátt ríki. Æskilegt er að nægur tími gefist til að tryggja kynningu og umræður þannig að sameiginleg niðurstaða náist sem yrði traustur grunnur fyrir nýja stofnun.

Með vinsemd,

Guðrún Agnarsdóttir forstjóri  
Krabbameinsfélags Íslands